

# BAHEBERU,

## *KHAOLO EA BOBELI* <sup>2</sup>



Ho tla pele, le ho hlahloba Mangolo, a tle a khone ho a bapisa ho bona haeba e ne e le 'Nete kapa che. O ile a e nka eona, 'Nete, kapa Testamente ea Khale. Joale, Pauluse e ne e le lekoloane la Testamente ea Khale. Ba bakae ba tsebang hoo? [Phutheho e re, "Amen."—Mong.] O rutiloe ke e mong oa barutehi ba hloahloa ba letsatsi la hae, Gamaliele, morutehi ea hlahileng ka mahetla. 'Me Pauluse o tsebile Testamente ea Khale. 'Me ke nahana hore o khohlophile, ho latela puo ea ka hoseng hona, mohla a ne a paka lefu la Setefane. Pauluse o tsoanetse a be a ile a tsoaroa ke ho hong, hobane ha a phetse ho khutlela ho eona lingoloeng tsa hae tsohle, "Ha ke na tokelo, hobane ke hlorisitse Kereke ho isa lefung. Ke e monyenyanane hara bona."

<sup>95</sup> Oh, empa Molimo o no o e hopotse ka tsela e fapaneng. E ne e le e mong oa banna ba linatla oa letsatsi.

Bonang Mohalaleli Pauluse, moapostola oa  
senatla

Kobo ea hae ha se le ho phatsima, (seroki se  
itsalo)

Oh, ehlile ho tla hle ho hlajoe litlatse  
Mohla bohle re teanang Mane.

Letsatsing le leholo leo mohla ke 'monang a fuoa moqhaka  
oa moshoeletumelo, mopotso oa moshoeletumelo!

<sup>96</sup> Nkile ka ema pela serojana sa khale, nakoana e fetileng mona, hona moo a ngoletseng Mangolo ana. 'Me eaba ba khaolo hlooho ea hae shoqo. Eaba ba mo kolumetsa ka hara swirisi, ho hlatsoa swirisi. 'Me Mojudyenana enoa mono, o itse, "Ke jere mabote a Jesu Krete 'meleng oa ka. Ke loanne le libata Efese, empa ke loanne ntoea e molemo. Ke qetile sebaka. Ke bolokile Tumelo. 'Me ho tloha joale, ke beetsoe moqhaka oa ho loka, oo Morena, Moahloli oa ho loka, a tla mpha oona ka Letsatsi leo. 'Me ha se 'na ke inotši, empa le bohle ba ratang ho hlaha ha Hae." Kamoo ke ratang hoo! Oh, ke batla ho baloa 'moho le bao! Re ne re tloetse ho bina sefela:

Oh, na u tla baloa u le e mong oa mohlape oa  
Hae?

Na u tla baloa u le e mong oa mohlape oa  
Hae?

U hloka sekoli kahare, ho lebella le shebella  
pono eo e bokoang;

O tla boela a khutla.

97 Ke batla ho ba e mong oa bona. Joale sengoli se tsoelapele, se re:

*Ka baka leo eka khona re ele ka . . . fetisa litaba tseo re seng re li utloileng hloko, esebe ra suthela hole le tsona.*

98 Mokana re rutille ka eona, hoseng hona, temana ea 2 e sebetšana le hoo, “Hobane . . .”

*Hobane ha esitile lentsoe le builoeng ke mangeloi . . .*

99 Re fumana *mangeloi* e le eng? Baporofeta. “Molimo ha o no o buile mehleng ea khale . . .” Joale, u tlameha ho etsa, ha se mohopolo oa rōna ka sebele, empa Biblele. Joale khaolo ea 1, ea khaolo ea 1, temana ea pele.

*Molimo, ha o no o buile hangata mehleng ea khale . . . ka mekhoha e mengata . . . bontata rōna ka baporofeta,*

100 Joale o tsoela mono, 'me o boela a bua.

*Hobane ha esitile lentsoe le boletsoeng ke mangeloi a ne le tiile, . . .*

'Me ebe *lengeloi* le bolelang? “Moromuoa.” Ha esitile Molimo o tlotsitse moromuoa . . . 'Me efēla haeba re tlotsitsoe, re barongoa ba Molimo. Re barongoa ho lefatše, lenqosa la Leholimo, re ipolela re le baeti le bafeti. Ha re ba lefatše lena. Empa re batla Motse o tlang ho tla, oo Mothei le Moahi oa oona e leng Molimo. Ha re boloke matlotlo a rōna lefatšeng lena, moo masholu a thuhang a kena, le bommoto, le mafome, le ho bola ho ahileng teng. Hobane, matlotlo a rōna a bolokiloe Leholimong, moo Jesu a lutseng letsohong le letona la Boholo. Oh, ke taba e khanyang le babatsehang ha kae, ho tseba hoo.

Tšepo tsa rōna ha lia ahoa holima letho  
Haese mali a Jesu le ho loka;  
Mohla tse u likileng li helelang,  
Ke Eēna tšepo ea rōna le matla.

Ke ema, holima Kreste, Lefika le tiileng;  
Mobu oohle ke 'hlabathe le tebang,  
Mobu oohle ke 'hlabathe le tebang.

101 Eddie Pruitt o khonne joang ho ngola sefela seo, mehleng ea lihloriso!

*Joale, hobane ha esitile lentsoe le builoeng ke mangeloi le tiile, . . . (Enereha moromuoa oa Molimo a buile Lentsoe, Le ne ne le tiea.) . . . 'me moputso o mong le o mong o hlahetsoe ke moputso o ho lekanang;*

*Ana re tla phonyoha joang joale, ha re sa utloe Kreste, Ea buoang ho tsoa Leholimong?*

Joale shebang.

*Ana re tla phonyoha joang, ha re sa hlokomele poloko e kalo; . . . (E nahaneng) . . . e neng e qala ho boleloa pele ke Morena, . . .*

102 Kreste o qala mosebetsi oa Hae. O ile a etsang? Rea Mo bona, kamoo A . . . boikokobetso, boithobo, kamoo E neng e se monna ea ipabotseng ea kang moithuti oa thutabomolimo. Empa O ne a ikokobelitse, mosa, bonolo. E ne e se moreri ea matla. Lentsoe la Hae le ne le sa utluoe seterateng.

Empa Johanne o tsoile sa tau e purumang. E ne e le moreri.

103 Jesu o tllile, e sa ke tau e purumang, empa Molimo o no o sebetša ka Eèna, ho tiisa Lentsoe. Molimo o no o le ho Kreste. Petrose o boletse, ka Letsatsi la Pentekosta, “Lona banna ba Iseraele, le lona ba ahileng Judea . . . Jesu oa Nazaretha, Monna eo Molimo a mo pakileng hara lona, ka lipontšo le mehlolo le meeka, eo Molimo o e entseng ka Eèna, hara lona bohle, etsoe bohle le le lipaki tsa taba eo.” Le mo shebe kamoo a ba qhoaetseng eona. “Le tlamehile le be le Mo tsebile.”

104 Jesu o itse, “Baikaketsi ting.” Ho re, “Lea tsoa le sheba letsatsi, ebe le . . . Le lefubelu le sithabetse, le re, ‘Hosasa boso bo tla hloenya.’ ” Me ha le hlakile le chabile, kapa joalo, le re, ‘Boso bo tla bososela.’ ” Ho re, “Le khona ho lemoha sebaka, empa haele lipontšo tsa mehla, ha le khone ho e lemoha. Hoba holane le tsebile ’Na, le ne le tla tseba letsatsi la Ka.”

105 Oh, O ne a ka hooa a reng bosiuang bona. Kamoo Moea oa Hae o hooetsa ka bareri ba Hae, “Hora e atametse!”

Rea lemoha. Re sheba libomo tsa atomo. Re tseba ea tla tlatsa sekheo sa Clark Gables, le ea tlang ho etsa *sena, sane*, kapa se *seng*; kapa motlatsa-presidente e tla ba mang. Re thahasella hoo, empa ha re khone ho lemoha lipontšo tsa mehla. Re nakong ea qetelo.

106 Ke eng? Haholo re thahasella, “Khaolo e latelang ea thelebishene ke efe? Ebe Susie o tla etsang?” kapa kana lebitso la mosali eane ke lefe. “Ebe Arthur Godfrey o ea kae? Ebe o tla pheta motlae ofe khetlo le latelang?” Rōna, joaleka Mokreste, re topela kelello ea rōna ka peqe-peqe e kang eo, athe re tlamehile re be re lutse thapeng nqa e ’ngoe, le ho bala Bibe, ho tseba lipontšo tsa mehla eo re phelang ho eona.

107 Ho hlhisang hoo, nakong ea rōna, ke lifala tse fokolang, ke hantle, tse sa tiisetseng ho hlhisisa ’Nete ea Evangeli. Re tla tlameha ho ikarabela mehlang e tlang. Ha rea tšoanela ho hlokomoloha letho. ’Me batho, re sa le mona Branham Tabernakele, ho bona lipontšo le meeka, le matla a Kreste ea tsohileng; le ho tseba nako ea rōna—rōna re e sebelisa linthong tse ling, ha re hlokomele ho utloa Lentsoe la Morena Jesu, “Ana re tla phonyoha joang, ha re sa hlokomele poloko e kalo?”

108 Temana ea 3, kapa temana ea 4. Moo re qeteletseng teng ke mona, temaneng ea 4, hoseng hona.

*Ha Molimo o ntse o omela hammoho le bona, . . . (Oh, khili!)*

*Ha Molimo . . . o omela hammoho le bona, . . .*

Mamelang Lentsoe.

*. . . ka lipontšo . . . meeka, le liketso tse ngata tse matla, . . .*

Liketso tse *divers* tse matla keng? *Diver* keng? *Diver* e bolela “tse ngata.” “Ka mehlolo e *mengata*, Molimo o ntse o omela.” Oho Molimo! Kea tšepa E tla thophothela lipelōng tsa lona. Mamelang.

109 'Na ke e mong oa balisa ba lona, 'moho le Moena Neville mona. Ke batla ho le pakela Eona. Bibe e itse, “Ekare ha e mong a hlaha hara lona, 'me a bua *hore-le-hore*, 'me e sa hlahe, le se ke la e utloa, hobane ha Kea ka ka bua. Empa ekare ha a bua ka Lebitso la Ka, 'me seo a se boleletseng se hlaha, le Se utloe.” Amen. “Hobane Ke na le moporofeta eo, kapa moreri, e ka bang eng. Ekare ha seo a se boelang se hlaha, le mo utloe ke hona.”

110 Joale, metsoalle, ha re Mo utloeng, oona Moea o Halalelang o buang hara rōna, o bontša liketso tse ngata, le lipontšo, le meeka. Re se ke ra E tlolisa mahlo eka ke ntho ea tloaelo. Re hopole hore Ke Jesu Kreste, eèna maobane, kajeno, le ka mehla; ea tiisang Lentsoe la Hae. Re tšoanela ho etsa hoo. Oh, ka kopo hleng. E utloeng. Ntho e 'ngoe le e 'ngoe e beoe maamong a bobeli, esita le lelapa la hao, monna oa hao, mohatsa'o, bana ba hao. E ka bang eng, e bee bobeling. Bea Molimo pele. U re, “Moena Branham, holima bana ba ka?” Holima ntho e 'ngoe le e 'ngoe. Bea Molimo pele. E ke e be Eèna ea pele.

111 Elia o ne a theohe thabeng, tsatsi le leng. E ne e le lengeloi, moromuoa, moromuoa oa Molimo, motlotsuoa. Eaba o khaoletsa mosali oa mohlolohali a ntse a roalla lipatsi tse peli. A re, “Tloha, u ntokisetse senkhoha, u be u ntlisetse le metsana.”

112 Eaba o re, “Ka moea oa hao o utloang, ke saletsoe ke linkhoa tse lekanang, kapa hlama e lekanang ea koro, ho lokisa senkhoha se le seng feela. Ke bile ke na le ole e lekanang, ho e lubella, ho e futsoela 'moho. 'Me ke ntse ke roalla lipatsi tse peli.” Tloaelo ea sekhaleng, ke tloaelo ea leIndia, ea ho fapanya lipatsi u li hotetse bohareng, ebe u ntse u roteletsa. Mello e mengata ea liahelo ke e besitse joalo. Ha thoe, “'Me senkhoha seo ke tla se etsetsa 'na le moshanyana oa ka, leseba la ka. 'Me re tla se ja re ntoo shoa.” Komello e se e qetile lilemo tse tharo le likhoeli tse tšeletseng, metsi a le sieo hohle.

113 Moporofeta eo oa khale, ea thata, a shalima mosali sefahlehong. A re, “Tloha, senkhoha seo u se etsetse 'na pele.”

Molao o mokakang, ho monna ho laela mosali oa mohlolohali, ea shoang ke lephako, ho fepa eëna pele. O ile a reng? “Hobane HO RIALO MORENA, faki e ke ke ea fela, le lefiso le ke ke la omella, ho fihlela Molimo o nesa pula holima lefatše.”

Molimo, pele. Eaba o kena kahare a apeha senkhoa seo, a khutla a se phomosetsa moporofeta. A khutla hape a apeha se seng, le se seng, le se seng, le se seng. 'Me faki ha ea ka ea fela, kapa lefiso la omella, ho fihlela Molimo o nesa pula holima lefatše. A nea Molimo litulo tse ka pela bana ba hae. A bea Molimo ka pela ntho efe e sele. A amohela 'Muso oa Molimo, pele.

114 Molimo o tlameha ho nka tulo ea pele pelōng ea hao, tulo ea pele bophelong ba hao, tulo ea pele ho tsohle tseo u li etsang kapa seo u leng sona. Molimo o tlameha ho nka tulo ea pele. Ha A batle tulo ea bobeli. Ha A lokeloe ke tulo ea bobeli. O tšoaneloa ke se fetisang, le ea pele, le sohle seo re se ruileng. Sea a Mo tšoanela. Ho bokoe Lebitso la Hae le halalelang!

*Hoba Molimo o...omela, o pakile, ka lipontšo le meeka, . . . le liketso tse ngata tse matla, le ka lineo tse ajoang ke Moea o Halalelang, kamoo o ratang kateng?*

115 E seng se buuoang ke batho, seo kereke e se buileng, empa ka thato ea Molimo. Oh, re hloka thato ea Molimo, e seng mohau oa moahisane oa hao, kapa mohau oa bana ba hao, e seng mohau oa monna oa hao kapa mosali oa hao. Empa, batlang thato ea Molimo, 'me u etse hoo pele. Ke moo ntho ka 'ngoe, thato ea mosali le thato ea bana, e tla khohlela moo hantle. Empa, bea Molimo pele.

116 Shebang, joale.

*Hobane lefatše le tlang ho tla leo re le bolelang, ha o a ka oa le bea pusong ea mangeloi.*

117 Ka mantsoe a mang, Mangeloi a maholo a sebeletsang Maholimong, Gabariele, Mikaele, Lengana, le Mangeloi a Leholimo a mashome a likete atisa ka mashome a likete; kapa baporofeta ba mashome a makholo ba kileng ba fihla holima lefatše, e mong le e mong oa bona; ha O a ka oa bea puso ea lefatše le tlang tlasa bona, e leng leo re le bolelang. Ha ho le a mong! Ha O eso re, “Esaia, o tla busa lefatše.” Ha O eso bee lefatše tlasa puso ea Elia. Le joalo ha O a le nea Gabariele, leha e le lengeloi lefe, kapa moea ofe o sebeletsang.

118 Shebang seo a se buileng, Pauluse, o sa ntse a fapha Kreste, eo re mo bolelang.

*Empa e mong o pakile lengolong le leng, a re, Motho keng, ha o tla mo hopola? Kapa ngoana motho keng, ha o tlo mo etela?*

*O mo beile ka sebaka se seng sekae katlasana ho mangeloi; a mo roesa moqhaka oa khanya le ka oa hlomphe, 'me o 'meile ho busa mesebetsi ea letsoho a hao.*

119 Joale, ha u batla ho e bala, ke Lipesalema 8:4-6, ke Davida ea buang. Joale mona o bitsitse Davida eng? Ho lutse ho le joalo, hantle mono, le haeba e ne e lokile hoseng hona, ka moporofeta.

120 O itse, “Hobane lengeloi le leng le pakile sebakeng se seng.” Davida, moromuoa oa Molimo, e ne e le lengeloi la Molimo, hoba e ne e le moromuoa oa Molimo. Lengeloi le boletse, Davida o boletse, ho Lipesalema, “O Mo beile katlasana ho Mangeloi a Leholimo.” Lengeloi le itse Molimo o Mo beile katlasana ho Lengeloi, hore A tle a Mo roese moqhaka; hore A tle a hlorisoe a latsoe lefu, a tle a boele a phahamisoe. Hore A tle a Mo etse. . . ho beoa mojalefa oa lintho tsohle tsa lefatše. [Sekheo lebanteng—Mong.]

121 Joale, ho—ho Mattheu 28:18, re bala sena. Ka mora hoba A thakhisoe a be a tsohe ka letsatsi laboraro, O ile a kopana le barutuo ba Hae a ba laela ho ea ka lefatše lohle, ho bolella sebopuo ka seng Evangeli. O itse, “Matla oohle Leholimong le lefatšeng a beiloe matsohong a Ka. Matla oohle a Leholimong, matla oohle a lefatšeng, a neiloe 'Na.” Ke eng? Motho le Molimo ba kopane. Logos e ne e entsoe nama 'me ea bolaoa, ea tsohela tokafatso ea rōna, 'me ea eba Emmanuele ea tlotsitsoeng ka mehla le ka mehla. Molimo o no o fetotse bolulo ba Oona, ho tloha Teroneng e holimo koana libakeng, ho ea pelōng ea Mora oa Hae, Krete Jesu, ho phela le ho busa ka mehla. “Molimo o no o le ka ho Krete.” Ke Eèna nqalo ea ho qetela ea phomolo ea Moea.

122 Moea o nong o ahile kahara tabernakele, tsatsi le leng, le tseba seo, tlasa tente. “Solomone ke eèna ea Mo hahetseng ntlu. Empa, koana, ea Holimolimo a ke ke a aha matlung a entsoeng ka matsoho.” “Empa U Ntokiselitse 'mele.”

123 Koana Bukeng ea Liketso, khaolo ea 7, mohla a ne a bua, o itse, “Bohle ba E bonetse pele. Ba kile ba Mo ahela tente, ke Moshe eo, o ne a ena le tente, le ho kenya areka ka mono, hoba Molimo o no o lutse holima Setulo sa Mohau. O ne a sa lule mono.” Ke hantle.

124 Hape, “U Ntokiselitse 'mele,” 'mele oa Morena Jesu Krete, ea beiloeng katlasana ho Mangeloi ho latsoa lefu; 'me e ne e se letho haese eo ea Phahameng ka ho fetisa, Krete; Khosana ea Khotso, Khosi ea likhosi, Morena oa morena, 'Mopi, naleli e 'ngoe le e 'ngoe ea bokahoohle.

125 Oho Molimo! O ile a thehela katlasana ho popo ea Hae, A tle a lopolle motho (ea se nang lehae, monna ea se nang molemo), le ho ba nea lehae Leholimong. A tēla litlotla tsa Leholimo. A tēla Lebitso le phahameng ho feta le neng le ka bitsoa. 'Me mohla A ne a le holima lefatše, motho o Mo reile lebitso le tebileng le le tlase leo A ka le reoang, ha thoe, “E ne e le lese la bonyatsi, le ho qaleng.” Ho tsoalloa sejeleng, ho phutheloa ka makhasa a tsoang jkong ea pholo.

Nqalo ea ho kena e le sieo, lehae la ho kena le le sieo. Le ho bitsoa, “Belsebule,” mampoli oa batemona. A tsoaroa hampe. A tsoeloa ka mathe. A songoa. A khesoa, a ba a theohela mampong a tebileng ka ho fetisa, a inama pela “Liotsoa se sōrō ka hō fetisa.” Ke seo motho a Mo entseng sona.

126 Empa Molimo oa Mo phahamisetsa holimo hoo A tlamehang ho nyarèla fatše ho bona Leholimo. Motho o Mo neile setulo se tlase ho feta, ho Mo nea setulo se fetisang ka ho bobbe, lebitso le tlase ka ho fetisa. Molimo o Mo phahamisitse oa Mo nea Setulo se phahameng ka ho fetisisa, le Lebitso le fetisisang ka boholo. Ke eona phapang ea se entsoeng ke motho ka Mora oa Molimo, le se entsoeng ke Molimo ka Mora oa Molimo.

127 O ile a inama, hore rōna re tle re phahame. O ikentse rōna, hore rōna ka mohau oa Hae re fetohle Eèna. O tlile ha ba hlokanang lehae, le Eèna a se na lehae, hore rōna re tle re fumane lehae. O tlile ho bakuli 'me le Eèna a kula, hore rōna re tle re foliso. O tlile ho moetsalibe, “le ho etsoa sebe, ka boEèna,” hore rōna re tle re pholoso.

128 Hase mohlolo ha A ile a phahamisoa. Hase mohlolo haele moo E le Eo e leng Eèna bosiu bona. Molimo o ile oa Mo phahamisa, 'me matla oohle Maholimong le lefatšeng a neilo Eèna.

129 Ho feleng ha mosebetsi oa Hae oa lefatše, hona mona holima lefatše. . . O ne a tle lefatšeng, hang hoba A fihle, naleli ea meso ea Mo tumisa e le Mora oa Molimo. O ile a khohlopa diabolosi e mong le e mong eo A khahlaneng le eèna. Ho bokoe Lebitso la Morena! Batemona ba ne ba thothomela 'me ba tlakasele, ba kopa ho hauheloa, ka pela Sefahleho sa Hae. E, monghali. Lihele tsohle li tsebile hore E ne e le Mang.

130 Ho tsamaea ka boikokobetso, A se na moo a samelang hlooho ea Hae, bosiu mohla pula e nang. Tsona liphoofole tseo A li bopileng, “Linonyana tsa sebaka li na le lihlahla, le liphokojoe li na le mesima, haele Mora motho ha a na moo a samelang hlooho ea Hae teng.” Ehlile, E ne e le eèna.

131 O ile a fetoha sebe, a theohela tlase 'me a lahloa. Empa batemona ba Mo tsebile hore e ne e le Mang. Ba ne ba ikopela mohau. Ba itse, “U tlelang ho re hlokoatsa pele ho nako ea rōna.” Ka eona nako eo bareri ba ntse ba Mo bitsa, “Belsebule,” senohe ramahlohonolo; athe batemona ba ntse ba Mo bitsa, “Mora oa Molimo o phelang,” 'me ba ikopela mohau.

132 Oh, kamoo re ka khefutsang motsotso! Uena u mang, le hona? Mosebetsi oa hao o bolelang? Kapa ntlunyana ea rōna e bolelang? Koloi ea rōna e bolelang?

133 Mosetsana e motle, uena mothoana ea mahlahahlaha, chebeho ea hao e etsang hajoale? Bahlankana ka moriri o phatsimang, o boleea, ka mahetla a batsi; u tla khutlahana tsatsi le leng, mohla lilemo li u khopanyang.

134 Empa, ho bokoe Morena! U na le moea o tsoetsoeng labobeli. U tla phela ka mehla le ka mehla, hobane O fetohile uena, hore uena ka mohau oa Hae u fetohe Eèna, le ho u lokisetsa bolulo.

135 Oh, rōna re reng re khona ho fetola liaparo, re hlohlile korosari e 'maloa ka tlung, ebe re eng? Molimo o ka e hlotha ka motsotsoana. Eona phefumoloho ea hao o e tšoere letsohong la Hae. Ho kena hara rōna ho folisa bakuli, ho tlaleha le ho paka, le ho lepa, ka phethhalo nako le nako. Esita le ho tsotella ho khutlisetsa hlatsoana, e shoeleng bophelo ba eona hape, hara rōna. Jehova ea re teetseng hare, Jehova ka ho rōna, KE TENG e moholo ea matla.

136 Mohla A ne a eshoa, ba itse ba Mo fumane. O ile a nyolohela kahara lihele. Eitseha A falla lefatšeng tsatsing leo mohla A ne a thakhisoa, O ne a theohlele linqalong tsa ba lahlehileng. Bible e boletse, "O ne a ee ho bolella meea e teronkong, e sa kang ea baka litšiueng tsa mamello e telele, matsatsing a Nohe." Eitseha A eshoa, 'me le Moea oa Hae o Mo tlohela, O ile a fetoha Logos eo hape. Eèna, kea bona, ho itsoe, "Ke tsoa ho Molimo. Ke boela ho Molimo."

137 'Me Molimo e ne e le Topallo eo ea Mollo e tataisitseng bana lefeelleng. 'Me mohla A ne a le lefatšeng mona. . . Eitseha A eshoa, O khutletse Leseling leo hape. Pauluse o Mo bone, 'me E ne e le Leseli. Ha A ka a bonoa ke mang oa bao. Ba bone Pauluse a oela fatše. Ntho e ne e mo teile, 'me E ne le Leseli. Pauluse o ile a re, "Ke ntse ke hlorisa Mang?"

138 A re, "Saule, Saule, u Ntlhorisetsang?"

Ho re, "Ke Mang eo?"

139 A re, "Ke 'na Jesu, eo o mo hlorisang, 'me ho thata ho uena ho raha litsenene."

140 Eaba o tloha a ea hlahloba Leseli leo. Pauluse a khutlela Bibeleng, ho fumana seo Leseli leo le neng le le sona. 'Me a ngola Lengolo lena. Esale Jehova eo. Lona Leseli le haotseng le bana ba Iseraele lefeelleng. 'Me mohla Petrose a ne a hlahletsoe chankaneng, E le Leseli leo le keneng la ba la bula menyako.

141 'Me ka mohau oa Hae, hore mang le mang a hloke boitatolo. . . Oh, hola ba ka lebala barongoa ba sa balang, 'me le hopole: hase moromuoa, ke Molaetsa. O boetse o theohile, o na le rōna, ka sebopeho sa Topallo ea Leseli. 'Me O sa tsamaea ka mehlolo eo ea Hae hape le lipontšo, hase letho le kantle ho Bible; ho lula le Bible hantle, ho e bea tlasa bolaoli boo, ho khantša khanya ea Hae, ho bontša matla a Hae. Ho bokoe Lebitso la Hae le halalelang!

142 Kea tseba le tšoanela ho nkuka ke hlanya; empa, oh, Phomolo eo ea Bosafeleng e ahileng moeng oa ka. Leha lifèfo li ka khoroha ka maqhubu, tšetleli ea ka e setletse kahara lesira.



143 Le ho 'Mona mohla A ne a eshoa, hofihlela, khoeli e otloa methapo e honyela. Letsatsi la likela hara mpa ea letšhare. Eareha A etèla linqalo tsa ba timetseng, [Moena Branham o kokota hane sefaleng—Mong.] ho kokota monyako, eaba monyako o a buleha. Bible e boletse, “O ile ho bolella meea e teronkong, e sa kang ea baka mamellong ea matsatsi a Nohe,” ka mora ho shoa ha Hae lefatšeng lena. Moena oa ka, khaitsetli, mohla A ne a eshoa, mosebetsi oa Hae lefatšeng o ne o qetilo, empa A sa ntse a sebeta. Le bosiuong bona O sa ikahetse mosebetsing. Amen.

144 Eaba O kokota menyako ea ba timetseng. Bible e Mo tlalehile joalo. 'Me A paka, “Ke 'na Peō ea mosali. Ke 'na Ea boletsoeng ke Adama. Ke 'na Ea boletsoeng ke Henoke a etla ka bahalaleli ba Hae ba likete tse leshome. Ke 'na Mora oa Molimo o phelang, 'me lona le sitetsoe letsatsi la lona la mohau. Athe le ne le porofeteloe, ke mangeloi, Henoke, Nohe, ha thoe Ke tlameha ho tla phethisa Lentsoe le leng le le leng la Bible ea Molimo. Ke tlile koano ho paka 'lefatšeng lena la ba timetseng.” Eaba O a ba rerela.

Eaba O theohela koana lihelong, a fihla hantle koana menyakong ea lihele, a kokota monyako. Liabolosi a bula monyako, ha thoe, “Joale ke U fumane.”

145 A ntoo rutla linotlolo tseo lephakong la hae, ho re, “Uena liabolosi, u thetsitse nako e telele.” Ke ena, hantle mona kahara Bible. Ke e tšoare motsotsong. “U thetsitse nako e telele, empa Ke tlile ho laola.” Eaba o phamola linotlolo tseo a boela a mo rahela kahare, a khahlela monyako.

Ho tla joalo eaba o thonaka Abrahamama, Isaaka, le Jakobo. Ka letsatsi la boraro A tsoha, 'me ba robetseng mabitleng ba tsoha le Eèna. Oh, allelu! Hase mohlolo ha seroki se itse:

Bophelong, O nthatile; lefung, O mpholositse;  
 Kepelong, O lahletse libe tsa ka hole;  
 Tsohong, O lokafalitse feela kamehla,  
 Tsatsi le leng O a tla, oh, Tsatsi le khanyang.

146 Ho bokoe leqhaama leo le tlamang lipelō tsa rōna ka botsoalle ba Bokreste, lerato la Molimo. Mohla A ne a tsoha, keha A eso qete, le joale. O ne a tlamehe ho phetha mosebetsi o mong.

147 Bible e itse, “O nyolohetse Holimo 'me o neile batho lineo.” Lefatše keha le okametsoe ke atmosfere, ea lefifi, ea tšarelo, ea lefu, le ho tepella. Lithapelo li sa khone ho nyoloha, kaha Pheko eso etsoe. Empa, O hahotse lesira leo. O butse tsela. O hahotse lesira la maloetse. O hahotse lesira la sebe. O hahotse lesira la ho tepella. O hahotse lesira la khatello. O hahotse lesira ka leng, a betla 'mila o etselitsoeng monna oa moleleri, a tle a tsamaee 'mileng oa Morena. Oh, khili, mohla A ne a feta khoeli le linaleli, le joalo le joalo!

148 Ka mora Hae, ha latela, ke mona ho latela bahalaleli ba Testamente ea Khale, Abrahamama, Isaaka, le Jakobo. Ba nyolohela holimo hantle maholimong a Leholimo. Eitse ba sa le hojana le Motse, ke ba bona ba lelalatsa mahlo a bona. Abrahamama a re, “Ke oona Motse oo ke neng ke labaletse ho o bona. Oh, tloo koano, Isaaka. Tloo koano, Jakobo. Oh, re ne re le baeti le bajaki ba lefatše, empa ke oo Motse. Ke eèna Eo esale re mo shebeletse.”

149 'Me Bibeletse e itse ba ile ba hooeletsa, “Le ke le phahame, lona menyako ea kamehla, le phahame, ho kene Morena oa Khanya.”

150 'Me Mangeloi motše ho menyako a hlabela mangeloi ana a motše mona mokhosi, 'me ha thoe, “Morena oa Khanya ke Mang?”

151 'Me mangeloi kantle mona, baporofeta, ba itse, “Morena oa Makhotla, ea Matla ntoeng.”

152 Eaba ba tobetsa litalama 'me lemati la letonana la buleha. Ke Enoa a kena hara seterata hantle, Mohloli, e le mofenyi, Eèna a latetsoe ke bahalaleli ba Testamente ea Khale. A lula Teroneng, ha thoe, “Ntate, ke bana. Ke ba Hao.”

153 A re, “Nyolohela koano u lule fatše, Ke be ke bee lira tsa Hao bonamèlo ba maoto a Hao.” Ha re ntse re bala, re e fumana mona kahara Lengolo. Ho lokile.

154 Mamelang joale. 'Me joale re temaneng ea 8.

Ke eèna eo ea *o beile ntho tsohle bonamèlo ba maoto a hae. 'Me ha...thoe lintho tsohle li beiloe katlasa maoto a hae, ha ho a lesoa letho...katlasa hae. Athe ha re eso ho bone...hoba tsohle li beiloe katlasa hae.*

Leo, ke lefu. Ha re eso bone lefu, le joale, hoba re sa ntse re eshoa. Re bona lefu.

Empa, temana ea 9, “Empa re bona Jesu!” Amen. Mamelang.

*...re bona Jesu, ea neng a beiloe ka sebaka se seng sekae katlasana ho mangeloi, a roesitsoe moqhaka oa khanya le oa hlomphe; ka baka la lefu leo a le utloileng hore ka mohau oa Molimo a utloe lefu ka baka la bohle.*

Horeng A ile a beoa katlasana ho Mangeloi? Hore A tle a latsoe lefu. O ile a tlameha ho shoa. A tlameha joalo, ho tla tla shoa.

155 Sheba mona, motsoalle. U se e lebale, le ka mohla. Mohla Jesu a ne a tsamaea, a nyoloha leralla, keha lefu le bobola le teetse hlooho ea Hae hare.

156 Ha re fallisetseng setšoantšo sa rōna Jerusalema, lilemo tse likete tse peli tse fetileng. 'Me ebe le ka E hana joang? Ke utloa

letomotomo le tlang ka seterata. Keng? Ke selō se otlalang. Ho theoha sefapano sa khale se makukuno, se tsoa likhorong tsa Damaseka, se hohlana holima majoe a koble. Lipitla tseo tsa majoe li sa le teng. Se hohlana holima lipitla tsena tsa majoe, koto-kotong. Ke bona Mali a hafatsehang seterateng. Keng? Ke Monna ea sa etsang bobbe leha bo le bong; a sa etsa letho haese ho loka. Batho ba ne ba foufetse. Ba ne ba sa Mo tsebe. Ba sa Mo elelloe.

U re, “Sefofu? Na ebe ho joalo ba ntse ba bona?”

157 U ka 'na ua bona feela ua ba sefofu. Le lumela hoo? Bible e itsalo. Le hopola Elisha tlase Dothane? O ne a tsoe a otl batho bao ka bofofu, ho re, “Joale ntateleng.” Ba ne ba mo foufaletse.

158 'Me batho ba foufetse bosiuang bona. Kereke e itseng e sa lumeleng pholiso ea Khalalelo, e kile ea tla ho 'na, ea re, “Nkotle ka bofofu. Nkotle ka bofofu.” E ne e le tlung ha Moena Wright. Ha thoe, “Nkotle ka bofofu.” Ha thoe, “Pauluse o ne a otle monna e mong ka bofofu, ka mohla o mong.” Ha thoe, “Nkotle ka bofofu.”

159 Ka re, “Motsoalle, liabolosi o se a qetile. U se u foufetse. Ehlile, u joalo.”

160 A re, “Folisa ngoanana enoa e monyenyanane ke tla lumela ho uena.”

161 Ka re, “Pholosa moetsalibe eane ke tla lumela ho uena.” Ruri.

162 “Oh,” a re, “u tlameha ho lumela.”

163 Ka re, “Ho a tšoana le mona, eka khona e tsoe mohaung ka bolaoli ba Molimo.”

164 Liabolosi, e—e molimo oa lefatše lena, o foufalitse mahlo a batho. “Ba ne le mahlo ha ba bone,” Bible e itsalo.

165 E ne e le Enoa, o ne a nyoloha seterata, se ne se hohla se koahela mehlala e Mali tseleng e nyolohang. *Notši* ea lefu e ntse e Mo hlabaka ka mathoko, e Mo likoloha e bobola, “Ho se ho se hokae ke tla U tšoara.” A 'na a eketsa ho tšerema, a nyoretsoe metsi.

166 Nkile ka thungoa, ke rapaletse mona tšimong, mali a phorosela ho 'na feela. Ke lla ke batla metsi. Eaba motsoalle oa ka o a matha, a tšoara katiba ea hae a e qoelisa metsing; metsi a khale a putileng, a nyeunyang mehatlana. A khutla, ka ahlamisana molomo oa ka; eaba o hlotla ntho eo. Hobane, mali a ne a tsaratsa joaleka seliba, ke thuntsoe ka sethunya. Ke nyoriloe!

167 Eaba ke tseba seo Morena oa ka a fetileng ho sona, hoba a fophe mali hoseng hoo hohle, ho qala ka hora ea borobong ho fihlela hora ea boraro mantsiboea, o ile a lahlehelo a ke Mali ao

oohle. Ke bona kobo ea Hae, pele, ho hlaha mathebana holima eona. Eaba mathebana ao oohle a qala a hola 'moho, a kolla a bopa phopi e kholo ea Mali, ea rotha ea Mo phaila moomo ha A ntse a tsamaea. Ao e ne e le Mali a Emmanuele. Oh, lefatše le ne le sa lokeloe ke Oona.

168 Empa eitseha A nyoloha, nakong eo *notši* ena e ntseng e Mo hlabaka. E ile ea etsang? Ebile qetellong e a Mo hlaba.

Empa, moena, mang le mang o a tseba, hore kokoanyana kapa notši, ha e ka u hlaba hang, mosebetsi oa ho hlaba o fella hona moo. Ha e sa tla hlola e hlaba. Hobane, ha e tloha, e rutla motsu oa eona.

Ka lona lebaka leo Molimo o ne a tlamehe ho etsoa nama. O totometse tsenene ea lefu nameng ea Hae, 'me O fothotse tsenene ea lefu. Ho bokoe Lebitso la Morena! Lefu le ka hoeshetsa la hlaba, empa le ke ke la u lematsa.

169 Pauluse, mohla a ne a utloa *notši* eo ea lefu e shesha e mo qekolotsa, e ne e le ha lefu le atamela. O itse, "Oho uena lefu, tsenene ea hao e kae?" A supa Kalvari moo e siiloeng nameng ea Emmanuele. "Ho hlola ha hao hokae? Empa ho bokoe Molimo o re neang tlhoho ka Morena Jesu Kreste." E.

170 Ha re bone lintho tsohle.

*Empa re hlile re bona Jesu, ea neng a beiloe ka sebaka se seng sekae katlasana ho mangeloi...ka baka la lefu leo a le utloileng...*

*Efela ho ne ho lokela, hoba eèna eo ntho tsohle—tsohle li etselitsoeng eèna, ka eo re nang le tsohle ka eena, ha a ne a qala...bana ba bangata... le ho etsoa morena e moholo oa poloko ea rōna...ka hlokoefatso.*

Mokhoa o le mong oo A ka beoa Mokapotene oa poloko ea rōna, O ne a tlamehe ho utloa bohloko.

171 Mamelang Mantsoe a matle ana mona. Joale mamelang.

*Hobane leha e le ea halaletsang leha e le bao ba halaletsoang ke...a le mong bohle:...*

Oh, ana ha le bone Morara le Lekala mono? [Phutheho e re, "Amen."—Mong.] Bohle ba Bang.

*...ka baka leo ha a na lihlong tsa ho bitsoa banababo,*

Ua bona? Hobaneng? Mamelang, temana e latelang.

*Ha a re, Ke tla bolella banabeso, lebitso la hao ke u binele lithoriso hara phutheho.*

*Hape o re, Ke tla mo tšepa. Hapehape o re, Bona ke 'Na enoa le bana bao u 'neileng bona.*

*'Me kaha bana ba na le kabelo nameng le maling, le eèna o ile a ba le kabelo teng joaloka bona; hore a fedise ka lona lefu la hae ea ruileng le 'muso oa lefu, ke ho re, liabolosi.*

*'Me a lokolle bohle ba neng ba le . . . hore ho tle ho . . . hore . . . ka baka la lefu ba neng ba beiloe katlase ho isa bohlangeng ka mehla oohle.*

172 Haesale motho a tšaba lefu. Kreste o fetohile sebe, o ile a theoleloa tlase, ho Inkela lefu. 'Me ha A na lihlong tsa ho bitsoa "Moena" oa rōna, kaha A kile a lekoa joalokaha le rōna re lekiloe. 'Me A ka khona . . . ekaba 'muelli ea tšoanelehang, kahobane A mameletse teko eo le uena u e mamellang. 'Me O nkile sebaka sa hao, o tsebile hobane u ka sitoa ho e mamella ka bo-uenā.

173 Ka baka leo, ana ha u bone, moena, khaitsetsi? Ntho eohle ke mohau. Hoo hohle ke mohau. Hase ka seo u se etsang, le hona. Ke ka seo A seng a u etselitse sona. Joale, u ke ke ua etsa letho ho rua poloko ea hao. Poloko ea hao ke neo. Kreste o fetohile sebe, hore uena u tle u beoe ea lokileng. 'Me Ke Mokapotene e Moholo ea tšoanelang poloko ea rōna, hobane O utloile bohloko joaloka rōna. O lekiloe joalokaha le rōna re lekoa. 'Me ha A na lihlong ho bitsoa "Moena oa rōna," hobane O tseba seo re se mamellang. Oh, ho bokoe Lebitso la Hae!

*Hobane kannete ha a ka a tlela tlhaho ea mangeloi; empa o tletse leloko la Abrahamā.*

174 Oh, khili! Ha A ka a fetoha Lengeloi. O ile a fetoha Peō ea Abrahamā. "Me rōna, ba shoeleng ka ho Kreste, re fetoha Peō ea Abrahamā, le majalefa ka pallo." Ua bona? Ha A ka a apara sebopeho sa Lengeloi. Ha A ka a fetoha Lengeloi. O ile a fetoha Monna. O ile a fetoha Peō ea Abrahamā, 'me a totometsa tsenene ea lefu nameng ea Hae ka Sebele, ho re boelanya le Molimo, 'me joale o lutse mono e le 'Muelli. Khele, re ka E hana joang, motsoalle?

175 Mamela.

*Ka baka leo ho ne ho tšoanetse hobane a ka etsoa ea tšoanang kahohle le banababo, e tle e be moprista e moholo ea mohau ea tšepehang litabeng tsa Molimo, a tle a etsetse sebe . . . sechaba pheko.*

176 Ho re E tle e be 'Moelanyi! Ua bona, bora bo ne bo hlahile pakeng tsa Molimo le motho. 'Me ha ho motho . . .

Ba ile ba romela mangeloi, baporofeta. A ne a ka sitoa ho tlatsa sebaka sa hao, kaha a tlameha ho ithapella boona. A ne a ka sitoa ho tlatsa sebaka seo.

177 Ebile, O romela molao. Molao e ne e le lepolesa le re hlahletseng chankaneng. O sitiloe ho re holla. O rometse molao.

O rometse baporofeta, O rometse ba lokileng, le ntho eohle, ba sitiloe ho etsa pheko. Empa eaba O a theoha 'me a fetoha e mong oa rōna. Oh, khili!

<sup>178</sup> Eka nako ea rōna ekabe e lekane hona joale, nka rata ho le fallisetsa koana molaong oa topollo; empa ha re na eona, empa nakoana feela. Setšoantšo se setle se ho Ruthe le Naomi. Haeba le ka bona mono, poelano, kadoo molemi oa tšimo, monna ea neng a tla lopolla lefa le lahlehileng le putlameng, eka khona ebe mohahabo motho ea lahlehetsoeng ke lefa. Lebaka leo Boase a ne a tlamehile ho ba e . . . e ne e le mohahabo Naomi, a tle khone ho fumana Ruthe. 'Me hape, o ne a tlamehile ho ba le tokelo. Eka khona a be le bokhoni ba ho e phethisa, ho lopolla se lahlehileng. 'Me Boase, mane khorong, o ne a pake pontšeng, ka ho raha a rola seeta sa hae, hore o lopolotse Naomi hammoho le lefa la hae lohle. 'Me o ne a tlamehile ho ba mohahabo.

<sup>179</sup> Lebaka leo Kreste, Molimo, a ileng a tlameha ho fetoha mohahabo rōna. 'Me O ile a theoha 'me e ne e le Monna. 'Me O utloile bohloko ba moleko. 'Me O tšehiloe, a songoa, a hlorisoa, a nyemotsoa, a ba a bitsoa "Belsebule," le—le ho seholloa, a ba a hlokoatsoa tlasa kotlo ea molao. Ua bona? O ne a tlamehe ho fetoha mohahabo rōna. O ne a tlamehe ho etseletsoa, hoba le uena u a etseletsoa. O ne a tlamehile ho jara maloetse, hobane le uena u a kula. O ne a tlamehe ho jara libe, hobane e ne e le libe tsa hao. 'Me O ne a tlamehe ho fetoha mohahabo rōna. Mokhoa o le mong oo A neng a ka re lopolla ka oona e ne e le ka ho fetoha mohahabo rōna. 'Me joale O fetoha mohahabo rōna, ka ho inkela sebopelano sa nama ea sebe 'me a fetoha e mong oa rōna. 'Me ka hono, O lefile moputso 'me a boela a re khutlisetsa botsoalleng ba Ntate. Oh, 'Moloki ea mokakang! Mantsoe a ka sitoa ho e hlalosa.

*Hobane erekaha a utloile bohloko mohla a beoang, . . . 'me ke kahoo a tsebang ho thusa ba lekoang.*

<sup>180</sup> *Succor* e bolela ho "utloela bohloko." Hoo, lebaka leo A fetohileng *sena*, hore A tle a le utloele bohloko lona ba . . . le nyolohang *meepa* le *metheo*, le linthoana tsa hao tsa *kahare* le *kantle*, 'me liteko tsa hao ke tsa litonana ebile ha u khone ho e mamella. O tseba ho u utloela bohloko. O lutse mono, ho fetoha 'muelli. O lutse mono, ho u rata. Leha u sitoa, A ke ke a u lahla. O tla u sala morao 'me a kokote pelōng ea hao. Mongala o mong le o mong ka moahong oona o a tseba hore Molimo o kokota pelōng ea oona letsatsi ka leng. 'Me O tla e etsa ha feela u ntse u le motho ea shoang holima lefatše lena, hoba O u ratile. O u lopolotse.

<sup>181</sup> Lirōki li lekile, bangoli ba lekile, motho esale a leka ho hlalosa khang eo ea "lerato," 'me ha e fumanoe hlalosong ea motho. E mong o itse:

Oh, lerato la Molimo, le monono le enne!  
 Le tebile hakakang le matla!  
 Le tla tiea kamehla,  
 Sefela sa bahalaleli le Mangeloi.  
 Hola leoatle la tlala enke,  
 Holimo e le matlaloana a ngolang;  
 Hlokoana ka leng e le lesiba,  
 Bohle e le bangoli ka khoebo;  
 Ho ngola lerato la Molimo holimo  
 Ho ka omisa leoatle khere;  
 Na lengolo le ka ngola tsohle,  
 Lehla le sarolotsoe sebaka sohle.

182 Le ke ke la utloisisa le ka mohla. Ho rōna ha ho mokhoa oa ho utloisisa mokhoa oa sehlabelo se sehlo se, seo A se entseng, ka ho theoha le ho re boelanya le Molimo. Eaba O khutlela morao ha thoe, “Joale, ha Nka ke ka le siea le le likhutsana. Ke tla khutla ke be le lona, le ka ho lona, ho isa bofelong ba lefatše.”

183 'Me ke rōna bana kajeno, re phela nakong ea bofelo, ka Jesu ea tšoanang, lintho tse tšoanang, lipontšo tse tšoanang, mehlolo e tšoanang, poloko e tšoanang, Moea o tšoanang o etsang lintho tse tšoanang, Evangeli e tšoanang, Lentsoe le tsoanang, lipapiso tse tšoanang, ponahatso e tšoanang, ntho e 'ngoe le e 'ngoe. Eka khona re ele hloko ho se suthela hole le poloko e kalo, hoba re tla lokela ho ikarabella, tsatsi le leng, ka seo re se etsang ka Mora oa Molimo.

184 O holima letsoho la hao bosiuung bona, moetsalibe, mongala. U tla etsang ka Eèna? U re, “Be, ke tla E qhela.” Empa, hopola, u se ke ua etsa joalo. Ha ho mokhoa, ho hang, haeba u le moetsalibe, u ka tsoang moahong oona 'me ua itulela u tšoana. U ke ke ua khona.

185 Pilato, bosiu bo bong, o kile a e leka. A kopa ho tlišetsoa metsi le ho hlatsoa matsoho a hae. Ho re, “Ha ke amane le Eona ka letho. Ho tšoana leha ke eso E bone. Ha ke eso utloe Evangeli. Ha ke batle ho amana le Eona ka letho.” Na ebe o khonne ho E hlatsoa matsohong a hae? O ne a ke ke a khona.

186 Qetellong, le tseba se hlahetseng Pilato? O ile a lahlehela ke kelello ea hae. 'Me holimo koana Switzerland, etsoe re ne re etetse teng ngoahola, ho rera Evangeli. Joale tšomo ea khale e tlalehile, ho thoe, letša la metsi le teng moo batho ba hlahang ka makhalo a lefatše lohle, ba shebella, selemo ka seng, ka nako ea thakhiso. Pilato, o ne a itšohlometse teng a shoa, ka ho ipolaea, a qhomela kahara metsi ana a noela. 'Me selemo le selemo, ka lona letsatsi leo, metsi a boputsoa ba leholimo a biloha letšeng leo, ho supa hobane Molimo o hanne metsi ao. Metsi a ke ke a hlatsoa Mali a Jesu matsohong a hao kapa moeng oa hao. Tsela e 'ngoe feela ho e etsa, ke ho A amohela e le tšoarelo ea hao 'me u boelanngoe le Molimo.

Ha re rapeleng.

<sup>187</sup> Ntate oa Leholimo, re U leboha ka Lentsoe bosiuong bona. “Hoba tumelo e tla ka kutlo, le kutlo ka Lentsoe.” Re U leboha ka Jesu. ‘Me ere re sa bona letsatsi le lehola lena leo re phelang ho lona, kamoo lipontšo le meeka, kamoo re lumellang lintho tsena ho suthela hole. Molimo, tutubolla mahlo a batho ba tabernakele ena, bosiuong bona, ba tle ba bone ‘me ba utloisise hore re fihlile lihoreng tsa ho qetela. Nako e feta e potlakile. Ha rea salloa ke nako e kalo mona, ‘me re tla tšoanela ho bona Jesu. ‘Me re tla lokela ho baloa re le mahlabaphieo, hoba boitatolo ha bo eo hoseng hona. Holima O bontšitse pono eo ea tonana, e matla, ea monna eo ea fihlang koano, a tsoa koana nahathote; ra ‘mona, ntle le pelaelo, a raoha setulong seo sa bakuli, a boela a bona. Maoto a hae a tiea, a thala hara moaho, ka nyakallo a boka Molimo. Hoo ho supa Molimo a sa ntse a khona ho tsoetsa Abrahamana bana le ka majoe ana. Ho bona lipono tsena, kamoo Jesu a boletseng, “Ha Ke etse letho pele Ntate a Mponša. Ke sitoa ho etsa letho.”

<sup>188</sup> Monna oa sefoku o kile a Mo sala morao, a re, “Ako nkhouhele hle.”

<sup>189</sup> A rialo, eaba o ama mahlo a hae a re, “Ho be ho uena, ka tumelo ea hao.”

<sup>190</sup> Joale, Morena, re bona Jesu. Ha re bone lintho tsohle. Re ipona re sa ntse re jara bahalaleli ba rōna ho ba isa lebitleng, re sa ntse re tšethema mabitla a ba bang. Empa re bona Jesu, ea entseng tšepiso. Re Mo bona a le ‘moho le rōna. Hase Jesu ea kahara lebitla, hase Jesu oa lilemo tse likete tse peli tse fetileng; empa ke Jesu bosiuong bona, ea nang le rōna. Re Mo bona a bonahalitsoe ka matla a Hae oohle, le lipontšo, le meeka.

<sup>191</sup> Molimo, re se hlokomolohle Poloko e kalo. Empa re ke re E sikare, re E amohele, re be le tšabo, re phele ka Eona hofihlela mohla Jesu a tlang ho re isa Lapeng. Aba sena, Morena. Re e kopa ka Lebitso la Hae.

<sup>192</sup> ‘Me ere re sa inamisitse lihlooho tsa rōna, ke ipotsa haeba motho a le teng ka moahong bosiuong bona, tlasa Boteng bo Mokhethoa ba Moea o Halalelang, ea ka reng, “Moena Branham, ke kholisehile hore ke phoso. Ke kholisehile hore ke phoso. Molimo o ntšenoletse libe tsa ka. ‘Me kea itseba hore ke phoso. Ke Mo phahamisetsa letsoho la ka ‘me ke kopa ho hauhelo, bosiuong bona. Molimo, nkhouhele. Ke phoso.” Na u etsa joalo?

<sup>193</sup> Ere re sa eme nakona, haeba motho ea batlang ho etsa hoo a le teng, ho tla kolobetsoa nakoananeng feela. ‘Me ha u le moetsalibe, nka baka. U ka hana lerato le sa lekanngoeng joang la Ea u shoetseng? Molimo oa Leholimo o halalelang o ile a fetoha Monna ea tletseng sebe; e se kahobane A entse



sebe, empa kahobane A ne a jere libe tsa hao, 'me a li isa mane Kalvari. 'Me ha u batle ho amohela teballo eo? Na u ke ke ua etsa hoo bosiuang bona? Re sa inamisitse lihlooho tsa rōna, motho ea reng, "Nkhopole, Moena Branham. Ke phahamisetsa matsoho a ka ho Kreste, 'me ke re, 'Nkhauhele. 'Na, ke phoso, 'me ke batla ho boelangoa le Molimo.'" Na u ka phahamisa letsoho la hao?

Ho lokile, haeba bohle e le Bakreste, ke hona, ha re rapeleng.

<sup>194</sup> Ntate, rea U leboha bosiuang bona, haele moo mang le mang ka mona e le Bakreste, ba pakile hoo ka ho ikhutsetsa, ho thoe libe tsa bona li tlasa Mali. 'Me ke lebohela hoo haholo. Ba hlohonolofatse, Morena. Oh, ke ba thabetse haele moo ba fumane poelano ka nyehelo ea Mali, ka ho utloa Lentsoe. Hlatsuo ea metsi, ka Lentsoe, Le a re hloekisa. Le re fihlisa tulong e kholo, moo—moo moetsalibe, ka lefifi la hae le soto, a soeufatsoang sa lehloa. Likoli tse sekarelata tsa sebe li hlatsoitsoe li tlositsoe, 'me re libopuo a tse ncha ka ho Kreste. Re leboha hoo hakakang, Uena, ka sena.

Joale ho tla latela kolobetso. Kea utloisisa hore mofumahatsana enoa, bosiuang bona, o tlil'o kolobetsoa tlase mona, ka Lebitso la Morena oa hae.

<sup>195</sup> Oho Ntate oa Leholimo, re U rapela ho hlohonolofatsa mofumahatsana enoa. Mohopolo oa ka o khutlela matsatsing a 'maloa a fetileng, ke nyoloha ka Henryville ke bona ngoanana ea ratehang eo a tsamaea mono seterateng. 'Me bosiuang bona, ke 'me, mofumahali. O U amohetse u le 'Moloki oa hae. Bophelo ba ngoana bo bile thata, Morena, oho Molimo, empa Leholimo ho eena le tiile. 'Me re U leboha kahoo. Rea rapela, Molimo, hore U tle u hlohonolofatse mosetsana joale. 'Me ere a sa nyoloha ho kolobetsoa ka metsi, U mo tlatse ka Moea o Halalelang oa Molimo. Aba sena, Morena. Soule ea hae e ke e nyakalle, ho ea fihla Maholimong! Sena se abele tlotliso ea Hao. Re e kopa ka Lebitso la Jesu. Amen.

[Sekheo lebanteng—Mong.]

<sup>196</sup> Ke batla ho bala ho Liketso, khaolo ea 2; ke Petrose ea buang, ka Letsatsi la Pentekosta, kolobetso ea pele e kileng ea hlakisoa kahara Kereke ea Bokreste. Petrose, o khalema Bafarisi le batho ba fofetseng, ka ho sitoa ho elelloa Mora oa Molimo; o ne a bua kamoo Molimo o Mo tsoisiteng, oa paka mesebetsi ea Hae, ka lipontšo tse kholo le meeka. Mamelang sena, a sa bua. O ne a fapha Jesu.

<sup>197</sup> Moea oa Mokreste e mong le e mong o fapha Jesu, e seng ka melomo ea hao feela, empa ka bophelo ba hao. Melomo ea hao e ka bua ntho esele, bophelo ba hao bo etse esele. Ha u etsa joalo, u a tseba keng? Ke boikaketsi. 'Me nka mpa ka tjamela Leholimo ke le mohetene sebakeng sa moikaketsi. Monyetla

oa ka o holingoana, kea kholoa, Leholimong, joale ka—joale ka mohetene, sebakeng sa moikaketsi. Ruri ke... Ha u paka Jesu 'me u re “Ke Mopholosi,” u mpe u phele ka tsela eo, hoba batho ba tlil’o e lebella ho uena. Ke hantle. Ako phele kamoo Mokreste a tlamehileng. Re fetile mono hoseng hona.

<sup>198</sup> Joale, ha Morena a ratile, hosane bosiu, kapa... Laboraro bosiu, re tsoarana le khaolo ea 3, e leng khaolo e babatsehang. 'Me joale, u etse bonnete ho tla Laboraro bosiu. Ba thabelang Buka ena ba bakae, thuto ena ea sekolo sa Sontaha? [Phutheho e re, “Amen.”—Mong.] Oh, ke le leboha haholo. Hoo ho hotle.

<sup>199</sup> Joale, ke batla ho bala joale ho Liketso, khaolo ea 2, ho qala ka temana ea 32.

*Molimo o tsoitse Jesu eo, 'me rōna...re lipaki tsa taba eo. (Ba tsebile hoo.)*

*Eitse hobane a phahamisitsoe letsohong le letona la Molimo, 'me a nke pallo ea Moea o Halalelang ho Ntatae, o qhatsitse, seo le se bonang le se utloang joale.*

<sup>200</sup> Joale mo utloeng ha a bolela Davida, le leng la mangeloi.

*Hobane Davida ha a ka a nyolohela leholimong: empa ke eèna ea itseng, MORENA o itse ho Morena oa ka, Lula letsohong la ka le letona,*

*Ke be ke bee lira tsa hao bonamèlo ba maoto a hao.*

Davida ha a ka a khona a ba a nyoloha; o ne a lutse tlasa mali a lithole, le lipōli, le linku. Empa joale o ne a ka khona ho tsoha; o ne a kene tlasa Mali a Morena Jesu. Hoba ba ikarebella Maling feela mohla A kenngoang tšebetsong. Mohla Mali a Kreste a ne a kena tšebetsong, bohle ba shoeleng ba neiloe mohau, ba ile ba tsoha, ke hantle, 'me ba nyolohela Khanyeng.

<sup>201</sup> Joale mamelang.

*Ka baka leo ntlu eohle ea Iseraele e ke e tsebe... (Mamelang sena)...hobane Jesu enoa,...le mo thakhisitseng, Molimo o mo entse Morena le Kreste.*

Le reng ka taba eo? Na Ke Moperesone oa boraro oa botrintase, kapa na Ke botlalo bohle ba borintase? Ke botlalo bohle ba Bomolimo, ka nama.

<sup>202</sup> Ha ho ntho e kang Melimo e meraro: Molimo Ntate, Molimo Mora, le Molimo Moea o Halalelang. Taba eo ha e fumanoe le kahara Lengolo, ha ho sebaka sa eona. Ha e eo hohle. Ha ho taelo e kileng ea laeloa ho kolobetsa, “Ka lebitso la Ntate, le ka lebitso la Mora, le lebitso la Moea o Halalelang,” ha ho sebaka kahara Mangolo. Ke molaoana oa Katolike, 'me ha o a etsetsoa kereke ea Protestanta. Ke kopa mang ho mpontša Lengolo le le leng moo motho a kileng a kolobetsoa ka tsela esele ho Lebitso la Morena Jesu Kreste.

Tloo, mpontše eona, 'me ke tla qhoaela letšoao sekotlong sa ka, "Moikaketsi, le moporofeta oa bohata, moruti oa bohata," 'me ke haole literateng. Ntho e joalo ha e eo. Ha ho motho ea kileng a kolobetsoa ka tsela eo. Ke molaoana oa Katolike, 'me hase thuto ea Protestanta.

203 "Mattheu 28:19," u re, "Jesu o boletse, 'E-eang ka lefatše lohle, le rute lichaba tsohle, le ba kolobetse ka Lebitso la Ntate, Mora, le Moea o Halalelang.'" E nèpahetse.

Empa e seng, "Ka lebitso la Ntate, lebitso la Mora, lebitso la Moea o Halalelang." *Lebitso* la Ntate, *Lebitso* (e seng mabitso), la Ntate . . .

*Ntate* hase lebitso. Ba tsebang hoo ba bakae? Bontate ba leng teng ba bakae mona? Phahamisang matsoho a lona. Bara ba bakae mona? Phahamisa letsoho la hao. Batho ba bakae mona? Phahamisang matsoho a lona. Ho lokile. Joale, lebitso la hao ke mang? E seng ntate, mora, kapa motho.

204 Mosali o kile a mpoella, eèna e le motrinitase oa makoma, o itse, "Moena Branham, empa Moea o Halalelang ke lebitso."

205 Ka re, "Moea o Halalelang hase lebitso. Moea o Halalelang ke seo U leng sona. Ke Moea o Halalelang." Hase lebitso; ke seo O leng sona. Ke motho, empa lebitso la ka hase motho. Lebitso la ka ke William Branham. Ka baka leo, haeba A itse, "Eang ka lefatše lohle, le rute lichaba tsohle, le ba kolobetse ka *Lebitso* la Ntate, le la Mora, le la Moea o Halalelang."

206 Eaba Petrose, matsatsi a leshome hamorao, o itse, "Bakang!" Joale, mona, mamelang taba ena.

*'Me eitseha ba utloa hoo, ba hlajoa teng lipelō, 'me ba re ho Petrose le . . .baapostola ba bang, Banna ba heso le baena, re tla etsa joang?*

*Petrose a re ho bona, Bakang, e mong le e mong oa lona, 'me le kolobetsoe ka lebitso la Morena Jesu Kreste tsoarelong ea libe tsa lona, 'me lea nka neo ea Moea o Halalelang.*

207 Ebe na Petrose o entse seo Jesu a mo laetseng ho se etsa? O ne a sa ferekana. Ba ferekaneng ke rōna.

208 Ho Liketso 2:38, Bajuda ba kolobelitsoe ka Lebitso la Morena Jesu Kreste, ka ho qoelisoa.

Ho Liketso, khaolo ea 8, re fumana Filipi a theohile 'me a reretse Basamaria, 'me a ba kolobetsa ka Lebitso la Morena Jesu Kreste, Basamaria.

Ho Liketso 10:49, Petrose o laetse Balichaba ho kolobetsoa ka Lebitso la Morena Jesu Kreste.

209 Pauluse, ho Liketso 10:5, "A haola linaha tse kaholimo tsa Efese, o fumana barutuo." E ne e le barutuo ba Mabaptise; e le, e mong le e mong, Mabaptise. Ba sokolohile tlasa thero

ea Mobaptise ea—ea bitsoang, ua bona, Apollose. 'Me e ne e le moriri oa Baptise, “'Me o ne a paka ka BibeLe hore Jesu e ne e le KreSte.”

Pauluse o itse, “Ana le amohetse Moea o Halalelang ho tloha le lumetse?”

<sup>210</sup> Ba re, “Ha re tsebe hoba Moea o Halalelang o teng.”

<sup>211</sup> Ho re, “Athe le kolobelitsoe joang na?”


<sup>212</sup> Ba itse, “Re kolobelitsoe ke eèna monna ea kolobelitseng Jesu, hona khatamping ea metsi a kantle mono. Hoo ho lekane.”

<sup>213</sup> Pauluse a re, “E ke ke ea sebetsa joale. Le tlameha ho kolobetsoa, hapehape.” 'Me Pauluse a ba laela ho kolobetsoa, hapehape, ka Lebitso la Morena Jesu KreSte. A ba beha matsoho a hae holimo, 'me eaba Moea o Halalelang o theohela holima bona. Ka nèpo. E, monghali.

Leseli le tla chaba nakong ea mantsiboea,  
Ruri tsela ea Khanyeng le tla e fumana;  
Tsela-metsing, Leseli le chabile kajeno,  
Ho patoa ka Lebitso la Jesu.  
Bacha le baholo, bakang libeng tsa lona  
tsohle,  
Ruri Moea o Halalelang o tla kena kahare;  
Leseli la mantsiboea le chabile,  
Ke linnete hore Molimo le KreSte ba Bang.

<sup>214</sup> Ke seo BibeLe e se buileng. Ke hantle. Ke eona hora. Ke nako ea rōna ho baka.

<sup>215</sup> Le bue, le hooeletse ha le lokile, kahara letša. 'Me re tla . . . [Moena o re, “Re malaala-laotsoe.”—Mong.] Ana le itokisitse? Ho lokile, le ka koala likharetene.

<sup>216</sup> Joale, Morena a le hlohonolofatse joale, nakong eo baenz ba bareri ba tsamaisang kolobetso. Na bohle le khona ho bona mona? [Moena Orman Neville o kolobetsa balumeli—Mong.] 

*BUKA EA BAHEBERU*

Melaetsa ena e leshome le motso o le mong ka Moena William Marrion Branham e reriloeng sethatong ka Senyesemane ho tloha ka Phato 21 ho haola ka Loetse 22, 1957, mane Tabernakele ea Branham, e Jeffersonville, Indiana, Amerika, e ntšitsoe mabanteng a likhatiso a makenete 'me e ngotsoe e sa khutsufatsoa ka Senyesemane. Phetolelo ena ea Sesotho sa Boroa e ngotsoe 'me e phatlalatsoa ke ba ha Voice Of God Recordings.

SOUTH SOTHO

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Krete. Buka ena e ke ke ea rekisoa, ea boela ea hlahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fua boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)